

Gandakan sumbangan wakaf tunai

MAIK galak orang ramai gandakan sumbangan, dapat pengecualian cukai

Oleh ADILA SHARINNI WAHID
KOTA BHARU

Majlis Agama Islam dan Adat Istiadat Melayu Kelantan (MAIK) muncul sebagai majlis agama Islam yang pertama di negara ini mendapat kelulusan pengecualian cukai untuk pewakaf tunai.

Kelulusan daripada Lembaga Hasil Dalam Negeri (LHDN) di bawah Subseksyen 44 (11d) Akta Cukai Pendapatan 1967 itu berkuat kuasa pada 1 Ogos lalu.

Yang Dipertua MAIK, Tengku Temenggong Kelantan Tengku Tan Sri Mohamad Rizam Tengku Abdul Aziz berkata, dengan pengecualian cukai tersebut akan dapat menggalakkan lagi orang ramai melipat gandakan sumbangan wakaf tunai untuk kesejahteraan bersama.

Kata beliau, MAIK juga menggalakan ketua-ketua jabatan supaya dapat bersama-sama memberi galakan



Mohamad Rizam (kanan) menyampaikan cenderahati kepada pewakaf, Zainon Che Soh, 53, pada Majlis Pelancaran Bulan Wakaf MAIK di Kota Bharu pada Isnin.

kepada kakitangan di jabatan masing-masing untuk membuat potongan gaji bagi sumbangan wakaf tunai MAIK.

“Menerusi inisiatif ini, sumbangan yang diperoleh untuk wakaf tunai akan terus meningkat.

“Pelbagai program dan projek ibadah berkeabajikan juga dapat dilaksanakan untuk memberi manfaat kepada seluruh masyarakat khususnya di nege-

ri Kelantan,” ujarnya ketika berucap pada Majlis Pelancaran Bulan Wakaf MAIK di sini, pada Isnin.

Menurut beliau, MAIK mula memperkenalkan wakaf dalam bentuk wang tunai itu pada tahun 2015 dan digunakan untuk memenuhi keperluan rakyat merangkumi kesihatan serta pendidikan.

Antaranya, pembelian peralatan perubatan seperti mesin oksigen untuk

membantu merawat pesakit Covid-19, mesin ultrasound untuk ibu mengandung, mesin *distortion product otoacoustic emission* (DPOAE) bagi mengesan pendengaran awal bayi dan mesin radiograf *orthopantomogram* untuk tujuan x-ray pesakit rahang gigi.

“Melalui sumbangan kesihatan ini, pihak MAIK berharap masyarakat Kelantan khususnya akan mendapat rawatan yang terbaik terutama bagi mereka yang tidak berkemampuan.

“Selain pembelian peralatan perubatan, MAIK menyalurkan wakaf tunai bagi menaik taraf bangunan tahfiz untuk memastikan para pelajar dapat menjalani proses pembelajaran dengan lebih selesa,” katanya.

Tambah beliau, sehingga Ogos tahun ini, MAIK menerima keseluruhan tanah wakaf sebanyak 1330 lot yang bernilai lebih RM216 juta bersamaan keluasan 526 hektar yang sebahagian besarnya dimanfaatkan untuk pembinaan masjid, perkuburan Islam dan tahfiz.

“Terdapat juga tanah wakaf yang dimanfaatkan untuk pertanian yang menjadi sumber sekuriti makanan negara dan seramai 500 keluarga yang menetap di atas tanah wakaf.

“MAIK kini sedang membangunkan dua tapak perkuburan terancang di daerah Kota Bharu dan Pasir Mas,” katanya.